

պրոտեկտներն<sup>8</sup> էին, իսկ քրիստոսասեր տեր Վասիլի օրոք հրա-  
ժարվեցին նավատորմիղում ծառայելուց և դարձան կայսեր ազրա-  
րիոնի պրոտեկտներ: Երջանկահիշատակ ամենախմաստուն Լևոն  
կայսեր ժամանակ, երբ նա ստեղծեց դրոմոնիոնները, այդ մարդ-  
կանց արիությանը և ծովում ունեցած փորձառությանը նկատի  
առնելով, նրանց դարձրեց պրոտոկարավներ:

...Այնուհետև կայսրը Պոդարոնին և Լևոն հային նշանակեց  
կայսերական նավատորմիղի տոպոտերետեսներ<sup>9</sup>...

Վերոհիշյալ Լևոն հայը, հանգուցյալ մանգլավիտ պրոտոս-  
պաթար Արսենի հայրը, վախճանվեց նավատորմիղի տոպոտերե-  
տեսի պաշտոնում, իսկ պրոտոսպաթար Պոդարոնը որոշ ժամա-  
նակ անց նշանակվեց Կիբիրեոտների բանակաթեմի<sup>10</sup> զորավար:

Պոդարոնը, նշանակվելով տոպոտերետես, Ֆիալեի պրոտոս-  
պաթար դարձավ պրոտոսպաթար Թեոփիլակտոս Բիմբիլիդեսը,  
պրոտոսպաթար Հովհաննեսի, Թալասսոն մականվանյալի եղբոր-  
որդին, և այդ պաշտոնում մնաց քրիստոսասեր տեր Կոստանդին  
Ծիրանածինի առաջին մենիշխանության<sup>11</sup> ժամանակ մի քանի  
տարի...

Գ Լ Ո Ւ Խ 53

ԽԵՐՍՈՆ ԱՄՐՈՑԻ ՊԱՏՄՈՒԹՅՈՒՆՆԸ<sup>12</sup>

Հռոմում Դիոկլետիանոսի թագավորության, իսկ Խերսոնում  
Թեմիստոսի որդի Թեմիստոսի պսակակրության և իշխանության  
ժամանակ<sup>13</sup>, Կրիսկոնորոսի որդի բոսպորացի Սավրոմատոսը<sup>14</sup>  
հավաքելով Մեոտիս լճի<sup>15</sup> շրջակայքում ապրող սարմատներին,  
արշավեց հռոմայեցիների դեմ, գրավեց լազերի երկիրը, պար-  
տության մատնեց բնիկներին և հասավ մինչև Ալիս գետը: Դիոկ-  
լետիանոս կայսրը իմանալով, որ լազերի երկիրը և Պոնտոսը  
գրավվել են, սարմատների դեմ զորք ուղարկեց: Զորահրամանա-  
տարն էր տրիբուն Կոստասը: Հասնելով Ալիս Կոստասը փորձեց  
թույլ շտալ սարմատներին անցնելու Ալիսը: Բայց չկարողանալով  
նրանց հաղթահարել, մտածեց, որ սարմատներին միայն մեկ ճա-  
նապարհով կարելի է քշել, այն է՝ եթե Բոսպորոսի և Մեոտիս լճի  
մոտակայքում ապրող [խերսոնիտները] նրանց պատերազմ հայ-  
տարարեն և հարձակվեն [բոսպորացիների] ընտանիքների վրա:

Նա ենթադրում էր, որ երբ այդ մասին լսի Սափրոմատոսը, վերջ կտա պատերազմին և կվերադառնա...

Պետք է գիտենալ, որ Տամատարիսա<sup>16</sup> ամրոցից դուրս կան բազմաթիվ նավթաբեր աղբյուրներ:

Պետք է գիտենալ, որ Զեխիայի<sup>17</sup> Պաղե վայրում, որ գտնվում է Պապագիայի<sup>18</sup> կողմում, և որտեղ բնակվում են զեխերը, կան նավթաբեր ինը աղբյուր: Ինը աղբյուրի նավթը մի գույնի չէ. նրանցից ոմանք կարմիր, մյուսները դեղին կամ սև նավթ են ցայտում:

Պետք է գիտենալ, որ Զեխիայի Պապագի կոչված վայրում, որի մոտ է գտնվում Սապաքսի կոչված գյուղը, որ թարգմանաբար նշանակում է փոշի, կա նավթաբեր աղբյուր:

Պետք է գիտենալ, որ նույն շրջանում համուխ կոչված վայրում էլ կա նավթաբեր մի աղբյուր: Խամուխ՝ հնում այդ բնակավայրը հիմնադրողի անունն է, նրանից է այն համուխ կոչվել: Այդ վայրերը գտնվում են ծովից նույն ձիով գնացողի համար մեկ օր հեռավորության վրա:

Պետք է գիտենալ, որ Դերզենե բանակաթեմում<sup>19</sup>, Սապիկիու կոչված վայրին մոտիկ, ինչպես և Եպիսկոպիու կոչված վայրին [մոտիկ] կա նավթաբեր աղբյուր:

Պետք է գիտենալ, որ Յիլիապերտ<sup>20</sup> բանակաթեմում, Սրեխիավարաքսի<sup>21</sup> մոտ կա նավթաբեր աղբյուր:

Պետք է գիտենալ, որ եթե երբևիցե խերսոն ամրոցը ապրտամբվի և ցանկանա որևէ բան կատարել ընդդեմ կայսերական հրամանների, քաղաքում [Կոստանդնուպոլսում] եղած խերսոնական նավերը պետք է գրավել իրենց ապրանքներով հանդերձ: Նավաստիներին և ուղևորներին կալանավորել և բանտ նետել, որից հետո անհրաժեշտ է երեք վասիլիկոս ուղարկել՝ մեկին Արմենիականների բանակաթեմի ծովափը, մյուսին Պաֆլագոնիայի բանակաթեմի ծովափը, իսկ երրորդին Բուկելլարների բանակաթեմի ծովափը, որպեսզի վար դնեն բոլոր խերսոնական նավերը, գրավեն նավերն ու նրանց բեռները, իսկ մարդկանց կալանավորեն և պետական բանտերը նետեն, որից հետո իրենց կատարածի մասին զեկուցեն: Բացի այդ, այդ վասիլիկոսները պետք է արգելեն պաֆլագոնական, բուկելլարական նավերին, ինչպես և Պոնտոսին պատկանողներին հացահատիկով, գինիով և որևէ այլ պարենով կամ ապրանքով դեպի խերսոն նավարկելը: [խերսոնի] զորավարը նմանապես պետք է դադարեցնի խերսոն ամրոցին տաս լիտր



ոսկու և երկու լիտր պակտոնի վճարումը և իսկույն հեռանա խերսոնից և գնա մի այլ ամրոց և այնտեղ հաստատվի:

Խերսոնացիք, եթե չճանապարհորդեն դեպի Ռոմանիա և չծախեն պեղենեզներից զնած մորթիներն ու մեղրամոր, չեն կարող ապրել:

Խերսոնացիք, եթե Ամինուսից, Պաֆագոնիայից և Բուկելլարներից, ինչպես նաև հարևան Արմենիակներից չներմուծեն անսուսուններ, չեն կարող ապրել: